

民素悍且侈君治悍以法易侈以儉俗稍稍近古宿  
豪大猾畏君如神明咸遁走境外治以最聞陞霸州  
知州州畿輔近地多權貴人君鋤梗擿伏弗少貸其  
在藍在霸並遭災饑祈禱輒應發廩賑貸二方之人  
德之大盜劉七起境內勢甚猖獗君單騎抵賊所開  
陳禍福反復懇至賊感泣惶恐約且解散聞者曰是  
果汾陽裔邪會逆堅索賄于賊激之南下攻屠城邑  
遠近騷然向使君之謀不撓即禍當不至此烈也有  
權璫者奪民田君按以法或曰彼且銜公柰何曰吏  
以庇民乃殃民以自庇邪執不變權璫者竟失田君

亦竟為璫所中罷去家居不問世事足不履公府日  
與所知觴詠自娛而已享年六十有二以嘉靖丙戌  
正月廿有九日卒後十有一年以子璠在諫議 賜  
誥進階奉直大夫配王氏封太宜人當君之存也太  
宜人相以儉德故君雖貧而若裕其後撫二子教以  
義方故君雖沒而益振稱賢配焉後君十有九年以  
甲辰六月四日卒于京師官邸享年七十有九子男  
二長即璠歷戶科都給事中陞太常少卿掌四夷館  
事次璠戶部郎中孫男曰治泰曰治統於是太常奉  
太宜人柩西歸將以年月日合葬於君北莊之墓而



請銘於予予聞之語曰有陰德者後必大郭君世為良吏其治人之澤殆不可縷數然仕皆不甚顯又躓抑以歸乃今太常君伯仲相繼舉進士為卿大夫喋喋未艾天道豈不邇哉誌而追銘之俾為善者有勸也銘曰

汾陽之孫其澤尚存高平始遷曰惟太原延德不替洽於後昆以威治霸勸民懷恩方盜始起一言可諭及其既猖三軍莫禦吏率自芘罔民之恤君志恤民力犯權敵鋤強樹良厥政屹屹除彼稂莠嘉穀以植光鄭之績歷霸再揚二世親民遺清白芳天降餘慶

厥後乃昌福以考終聞則無疆淑配慈儉後隕同藏  
勒珉新阡以永弗亡



鈴山堂集卷第三十

鈴山堂集卷第三十一 目錄  
誌銘

封翰林院檢討郭君墓誌銘

封尚寶司少卿徐君墓誌銘

贈南京工部員外郎葉公遷墓誌

榆次知縣崔公墓誌銘

適齋簡先生墓誌銘

拙齋袁翁墓誌銘

安處士墓表

汪處士墓表



鈴山堂集卷第三十

鈴山堂集卷第三十一 目錄  
誌銘

封翰林院檢討郭君墓誌銘

封尚寶司少卿徐君墓誌銘

贈南京工部員外郎葉公遷墓誌

榆次知縣崔公墓誌銘

適齋簡先生墓誌銘

拙齋袁翁墓誌銘

安處士墓表

汪處士墓表



劉處士墓誌銘

鈐山堂集卷第三十一

誌銘七首

明故封翰林院檢討郭君墓誌銘

君諱錦字尚綱姓郭氏南昌豐城人也世居縣西北  
十里曲江之上兒時舉止嚴整不肯同群兒戲里中  
長者多器之父淇川翁諱俊嘗行賈吳越間致饒裕  
以貲授君使習賈君雅不喜賈又不善權子本低昂  
歲餘貲貨遽耗請於淇川翁曰此非兒所能願改往  
業儒淇川翁許之君於是負篋徒步從師受易又受  
春秋已又受尚書精於尚書工爲文詞顧就試有司



連弗利則嘆曰敗於賈困於學命矣夫於是今贊善  
君希顏生六齡矣穎異絕倫君感夢有異徵乃又歎  
曰吾聞積不厚不發窮不極不通意者其在吾子乎  
遂杜門不復就試以尚書授希顏朝夕講辯鈎引穿  
貫與析隱測而希顏克傳其學嘉靖壬午希顏年甫  
十四髮黝然垂領而舉于鄉鄉人觀者駭矚盈堵淇  
川翁大喜曰夫士惡可弗擇所習邪吾兒果成其志  
又十年希顏登進士入翰林爲庶吉士授國史檢討  
又二年 皇太子生君以恩例受封如希顏官又三  
年冊立東宮希顏被簡陞春坊右贊善仍兼檢討君

寓書諄諄勉以效忠蓋希顏不獨以文學稱儕輩間  
其邁往勇特執議侃侃當所自信不少徇于衆嘗折  
薛學士祀議及監國議下又獨抗疏以爲不可嗟乎  
固可以觀君之爲教矣君素端肅以禮自將所居曲  
江介豪族而豪族人嚴重之莫敢有犯平居不干預  
官府事獨與親知結里社歲時伏臘會飲盡樂飲雖  
多揖讓愈飭蓋其性行如此去歲庚子九月二日君  
奄卒于家先是傳君得腹疾飲食頓減希顏恠不自  
定謀乞歸養而計已至距生成化甲辰八月八日享  
年五十有七曾祖諱原德祖諱惟信皆有隱德配雷



金川堂集 卷三  
氏封孺人子男四長即希顏次希曾希思俱縣學生  
次希孟早夭女一適縣學生杜遷善孫男二汝寧汝  
成希顏解官歸將卜某年月日於某山之原以葬而  
匍匐持其友閔中允所著狀詣予請銘以饒諸石夫  
以希顏之材之地崇顯可指取有而君則溘然不少  
待然其後也其所克享者又惡可涯涘哉是故不宜  
無銘也銘曰

業賈易儒既室而通操詘致羸利孰與豐山川出雲  
膚寸晦蒙厥施靈霽瀰于太空君子用遇不必自躬  
式穀貽嗣維以教忠湛恩遐祿未見其終尚焯于潛

銘告無窮

封奉直大夫尚寶司少卿徐君墓誌銘

君姓徐氏諱元相字弘弼常州宜興人少師兼太子  
太師吏部尚書華蓋殿大學士贈太師特進左柱國  
文靖公之子也上世鍾離人南唐時九世祖諱綱者  
尉於吳愛宜興山水之勝遂家焉高祖諱福封戶部  
郎中曾祖諱鑑永樂間知瓊州府事有惠政民立祠  
祀之祖諱琳隱德不仕自戶部公三世俱累贈少傅  
兼太子太傅戶部尚書謹身殿大學士祖妣妣俱一  
品夫人君少則穎敏日能記千言爲文出句輒有奇



氣而限於足疾因棄學業守家事幹理井井有條文  
靖公既入相以俸餘建家廟置祭器及爲義田以贍  
宗族君將事承志有助焉歲歉君發粟以賑貧疫死  
無歸者具衣棺殯之稱貸弗能償者輒焚其券姻族  
賓友遠方寒士賴君助者甚衆禁飭童僕毋作非法  
公喜曰是吾志矣公在任雖遠必時致鮮食未致不  
敢嘗晚年釋去家事放志林壑風日晴和雪月澄朗  
放舟携壺隨興所至手爲丹青以寄其適足跡不入  
城府二十餘年預營壽藏於紫雲山垣宇幽僻超然  
有塵外之觀焉朔望講家廟畢坐中庭諭子孫勉以

不替先聞配蔣宜人偕老相敬如賓宜人先卒君無  
他侍媵子文燦由祖恩官奉直大夫尚寶司少卿君  
受封如其官然仕服不時御既年八秩有司奉恩例  
具冠服粟帛貽君君曰封典可致耄期難逢乃始御  
仕服論者謂君行不易方性不矯俗樂不失真動不  
違禮蓋實錄云君生天順辛巳正月四日距卒嘉靖  
壬寅八月二十八日享壽八十有二子男六長即文  
燦次文煒錦衣千戶出爲季叔元槩後次文烟廣宗  
知縣次文煇上林苑監丞次文煒鴻臚通事次文炫  
早卒女三長適濟源縣丞沈誥次適成國公榮康朱



公今太保公希忠之嫡母也次適雲南按察司經歷  
陳道成孫男十四人曾孫男六將葬太保朱公曰外  
氏世載令德法宜得銘以彰示永禩乃自述狀而屬  
銘于予銘曰

徐自遷宜毓靈秀令德起家自瓊守餘慶迓祥發而  
厚篤生文靖相 明后功在社稷昌厥後飭躬訓禮  
來庭授義洽宗姻達賓友世德方隆復遐壽諸昆蟄  
蟄登章綬紫雲佳城何永久鏡石勒詞示弗朽

贈奉直大夫南京工部員外郎葉公遷葬誌

嘉靖壬午之秋南京工部員外郎葉君鵠以詔例得

贈其考石山翁如巳官階奉直大夫距公之卒且葬  
七年矣工部視地于邑來蘇鄉之吳塘謀改葬壤厚  
流匯卜者曰祥癸未五月二十一日葬焉既乃礲石  
刻制詞樹墓上而屬高誌其世系里居事行以昭示  
永久誌曰公諱瓊字廷瑞姓葉氏上饒羊石里人曾  
祖諱張福祖諱清父諱志顯娶龔氏生三子伯明德  
早世仲珠仕爲永春縣令季即公也端直信厚篤行  
友睦兄卒撫姪恩甚嘗割地以益其居民鬻產者必  
厚償其值曰彼以貧故也建橋濟涉發儲粟賑灾其  
貸而弗能償者未嘗問也公以上世皆弗仕永春仕



亦弗顯故每督諸子以學禮經師于塾姻族子弟招致館穀費自已出配丁氏有賢行能助公所爲由是卒見其子舉進士授浦城令擢六安州皆迎食其祿鵠脩職有聞率公之教然論者以公積德累善宜有子而非特其教之力也性不善飲雅好賓客燕必盡懽危坐終日不以爲勞既老而精神愈固正德丙子十一月十二日卒于六安之官舍年七十有三生正統甲子十二月二十二日初配丁氏繼配以周氏子五人長鵬次鵠即工部次麒次麟次鴻女二人孫男十人欽鏞鏐鏗鏜金鈞曾孫二人工部再起守蒲

州以至今官而子鏗鈞俱幼有異質績學大成葉宗將日盛公之慶未艾也銘曰

葉系石林肇居弋陽再徙羊石代晦其光積厚發閔初嗇終侈簪笏升朝緊公有子子有祿食親則享之人曰好德公實宜之公歸旣完公澤靡竟雲仍蜿蜿以篤其慶榮光下燭錫命自天峙此銘詩爲告新阡  
榆次知縣崔公墓誌銘

榆次公旣卒且葬二十有八年矣子三畏爲南京刑科給事中而奉其母太孺人楊來居無何太孺人卒予往吊給事袒括號慟拜且祈曰先君之卒也三畏



幼愚且賤銘誌未備茲以母喪還將卜日合葬於榆次公墓惟先生哀而賜之銘予教國學於給事有一日之雅弗克辭按狀榆次公諱岑字萬峯姓崔氏家世蠡人曾祖顯祖甫儀皆弗仕考諱翔舉鄉薦爲含山儒學教諭公承家學繼舉于鄉遊太學大司成稱其文以示多士士從遊者衆居父喪墓廬講學不倦數上春官弗第就選爲榆次令邑大健訟難治公剴裁無留事以其餘力飭學校公署圯敝者一新之督諸生程課親爲講說訓誘學者日起征虜大將軍師出境上車徒數萬張甚虓虎公從容酬給芻糗資犒

接濟有方閩境倚以爲安治榆五年惠立威振旁近諸邑罔不賢榆次公者然公性介特英邁自負以蹇直事上官上官即非禮遇之不爲屈既有違言則慨然歎曰是不可以已耶即日謝事歸蠡其後榆次人勒石作去思碑又述公治績彙爲錄傳焉公卒於正德丁卯九月二十四日享年五十有二子長三聘次三畏鄉舉第五人進士甲科出宰太谷考最擢今官授勅命贈公文林郎封母爲太孺人太孺人溫慎儉勤克稱內助卒于嘉靖甲午八月三日享年八十三孫男四孔登孔躋孔升孔愚女三適某某孫女三亦



各許聘士族銘曰

崔世迪德業治經博曰職訓端範刑公生剛明思奮  
升再仕弗耀後乃興爰有苞羽翔 帝庭如源斯瀦  
流澄澹銘勒玄石揚芬馨

適齋簡先生墓誌銘

適齋簡先生今大理丞騰芳之父也大理爲御史按  
汴擢今官念先生年高過家欲留待先生屢趣之曰  
往哉共職圖報無以我爲念也於是大理不得已乃  
行獨居京師嘗鬱鬱增疾乃今計至先生之卒嘉靖  
九年五月三日也年七十有七大理解官歸將以年

月日葬某山之原而屬嵩誌諸墓嵩姻也其奚以辭  
謹按先生諱成字緝典以字行臨江新喻人曾祖諱  
某祖諱顯漢考諱應夢皆隱德弗仕先生少穎異過  
人弱冠卽爲鄉塾弟子師端巖謹重里中人爭延致  
之久之弗樂羈束棄去携貲一涉荆吳之境間遇奇  
勝篇詠逸發已而輒復還曰適意而已豈必窮所至  
爲快哉先生嘗自謂少無他兄弟未卒所業結屋東  
園督諸子績學其間外檻兩芝繼生人以爲瑞大理  
夙稟英特造詣閎肆先生固心偉之曰是當成吾志  
已而大理果領鄉薦報至衆賀芝不虛生先生曰未



也巳而舉進士宰石首黃岡二縣巳而召爲臺有馳封之典先生皆預策之如所期焉初大理令石首迎先生就養弗許語之曰絮巳行端恕人量廣審思事得作善福興茲而有能爲養大矣故大理所歷有善狀以清白著稱超副九列爲時能臣先生之教也先生自奉甚樸服無華章室靡勝侍至族里周恤加厚撫外氏之孤仄厥孱墜賴有立焉元配黎氏同邑步溪望族有賢行封孺人繼配閔氏子長即大理霄騰芳也次縣學生霖次秋芳女適教周翰先生博通書史旁及山經地志陰陽琴卜之學善以時日卦例定

事休咎毫髮不爽凡先生之行出大理所自述又得太史歐君崇一所著狀皆合予乃爲銘曰  
惟意之爲適匪以好遊惟義之爲訓匪祿養是謀嗟若人兮好脩其藏茲丘兮銘以闡其幽

拙齋袁翁墓誌銘

分宜異時其俗朴其人淳龐故多壽考拙齋翁雖既老出入里門必步鄉飲禮請不數赴優老恩例受冠帶非其好被服布素鮮綺不肯一御子孫不能強也嘉靖乙酉正月四日以壽終年八十有五云翁諱璋字宗鼎姓袁氏其先自寧州西山徙分宜入國朝族



始大號車田袁氏高祖諱子芳生彥明彥明生象賢  
領永樂丁酉鄉薦象賢生正理翁父也翁生而敦重  
不逐群兒戲十歲喪母鞠于祖母夏侯氏夏嘗語人  
曰昌吾家者其此子乎君外樸而中慧遇事剖析有  
條善治生身致殷富雖歲居月積而施舍裒益相爲  
流通識度恢濶銖兩不數數較然計所獲乃倍他人  
數數較銖兩者少時父遣之治粟于莊令取遺利自  
殖翁卒事無纖毫私曰吾兄弟何可背之人有急難  
周之恐後里中貧窶待以舉火齧骼暴露掩葬尤衆  
元子二人早世翁盡力經紀其喪而撫其遺孤皆有

立其篤於義如此然匪以學蓋天質也初娶黃氏繼  
夏氏並有婦德子一人曰怡太學生予少則與太學  
君同邑校因始識翁翁以冢孫應樞求婚于予先祖  
尚書公曰表翁令德長者可弗諾諸即主聘焉應樞  
今選貢禮部孫男六人次應蘭應蕙應槐俱邑學生  
次應桐應芩女適陳相黃乾曾孫男四銳鏗欽鎬於  
是翁葬縣西昌田墓木拱矣予嘗許爲銘久未執筆  
也應樞屢奉父命以請嗟乎德人云亡不可作矣向  
之朴者日以澆靡叙次翁事而系以銘庶幾以識予  
之慨慕云爾銘曰



世競利以讐兮吾恥羸而弗取世徇侈以怙兮蹇獨  
安此素履嗟哉拙翁敦樸自躬如璞未斲有美在中  
厥丘崇隆厥木蒼葱厥來多祉施于孫子

安處士墓表

江之南有遺佚之士常州無錫堠村里安君嘉靖十  
三年閏二月癸丑終于里第明年二月乙酉葬于膠  
山塋之日四方來觀駢軫接艦溢于塗川子裕州大  
夫遣使告哀乞辭留都於是琢石紀德揭于新阡云  
君諱國字民泰其先黃姓高祖叔英來繼于安明善  
氏則是族之本也父諱祚娶司馬氏溫國文正公之

裔是生君君體質豐碩儀止詳華開朗之識發平髫  
卅年弱冠爲州閭所服兼覽群籍靡不尋暢恭已飭  
行愛衆親仁微密儉清晦而不耀由是月旦高於鄉  
評究其所立可謂好禮尚志偉出不群者矣君初承  
世基夙號殷裕既自崛起大振原田萑萑困倉莪莪  
錫川之稼如茨如雲父歿後不數年富侔封君矣然  
君志軌先民而不規近俗之陋氣凌物表而希播百  
代之風是故知貴勤以食力也故考林澤省農時佃  
夫穡人出不息之米以相其役知捐財以植義也故  
恤惻嫠賑窮乏焚券盈庭蠲租二萬石養無告之老



知禮義以阜俗也故闢門延師號曰義塾以教里之子弟知景行以崇哲也故飭李忠定張中丞之祠知利濟以廣惠也故甃通商之磴鑿溉旱之渠發濬塘之粟知篤親以尚厚也故撫猶子之孤賑舅氏之落賙業師之葬其它義行不可殫述初尚書西蜀李公巡撫東南講求水利時濬白茆塘方牽作舍之謀屢怵盈庭之議及得君指畫方畧舉措合宜勸懲有法民勇趨事迄于成功公大喜恨相見之晚寇發海島中丞伍公延君至幕下策多咨焉事平伍公言于朝爰有銀牌之錫君雅負經略志存烝人俾獲用世厥

所建立又豈少哉君嘗言曰昔人足蹟半天下而吾不出環堵亦吳人已爾乃北遊燕薊攀銀山望天壽抵居庸觀日岱宗視禮孔林已而泛大江躡匡廬循襄漢以憩于武當又道荆溪登龍池涉震澤窮搜天目諸山乃東至海上掠錢塘探禹穴窺天台鴈宕而還遊各有圖紀之詩君所爲詩即事暢懷高遠清逸自成一家言然則造物超俗可觀於斯矣君譽聞遐邇所至達官重卿虛館授粲文人騷士雲附景從或以爲江南大豪不知深慈樂易敬讓以得也方將攀逸駕於洪厓騁遐轡於關洛凌宇宙以高挹跨烟雲



金山堂集 卷之三  
以長遨享齡五十有四遭病而卒聞者慨惜焉君有子七人如山舉進士甲科入選中秘出領方州如磐如石如京如岡如陵如其皆競爽雋茂過庭受試學有造就予以歲丙戌典教國庠如山來立館下温敏而有文雖長膏紈不見盈侈之色雍雍恂恂有足異也因撫之而嘆曰蘭生謝庭玉產崑園其有自乎已而觀故相邃翁大宰龍灣廖公尚書二泉邵公鳳山秦公徃與君相善咸有論撰炳炳可考於是慨然痛君以遠志卓行溘然淪亡徽美弗述後將曷傳緬懷高蹤式表幽隧用貽于後之有識者云爾其銘曰

於惟安君稟氣淑靈含和匿耀避迹巖扃耽藝樂術貫究典墳振履雲嶽弭棹蘭津坡山之幽桂樹叢生婆娑謳吟遺忽世纓鳴瑟在御談扇猶新鴻儀零謝覲德無因懷哉永思刻石紀文身歿名流億載永芬

### 汪處士墓表

汪處士歙州潛川人也家世以賢雄曾祖彥實祖仕賢考永德高尚弗仕皆以義聞處士益振其先君之業能不私其財以賙鄉里歲饑所活甚眾嘗製泉著之衣千襲以散施貧民夷佛嶺之道鑿石築亭以便行者率族眾建祠祀先多行義事而罔德色潛川之



人稱焉蚤年商遊齊魯有鬻息女者處士以金買之  
既而母子相携慟哭不忍去處士惻然歸其女而置  
金不問民饑無所得食則赴水自澁處士亟募篙工  
拏舟拯之義聲震一時齊魯之人稱之如潛川焉處  
士享年八十有四終于家其遠邇竄獨窮窶之人皆  
曰汪公亡吾無所告依而生訟爭弗決者曰安得汪  
公在一言即渙然釋矣其興慕弗忘如此處士諱相  
字以輔別號澹菴生宣德乙卯十一月三十日其卒  
以正德戊寅十二月十九日配張氏有賢行二子曰  
柳曰櫛孫男四文柯太學生文翊文瑄文玠俱郡學

生予徃讀少傳王文恪公所著澹菴說謂處士春秋  
八十而有童孺之色曰近古之息心人也既已得翁  
之爲人同寅潘公歛人也又亟道翁善弗置嗚呼處  
士以一布衣而能施澤於人假令有官秩膺民社寄  
其不能憂人之憂澤之所及不尤廣耶而世有官秩  
膺民社寄者視民之窮非惟弗加恤又從而厲焉則  
如處士者其可不表以爲後勸耶系之銘曰

汪自越國肇封于唐勲在王室德庇其鄉繇宋歷元  
薊火嚴祀璽勅金書昭于世世惟公之姓碩大延蕃  
其來者遠如流有源孰散其藏而弗自有載其休聲



以遺永久惟公懋德寔大其門壽豈令終訖訖子孫  
倬哉潛川百室攸萃爲善有後惟汪公是視

耕隱劉處士墓誌銘

處士諱暹字景暉劉姓本泰和株林與前吏部尚書  
劉崧同出南唐學士某之裔祖世明徙家萬安石洲  
遂稱爲石洲劉氏六傳曰明德者仕元爲廉訪司知  
事於處士爲曾祖祖諱彥達以易經魁江西鄉試仕  
終府學教授父諱善慶正統己未進士官至刑部員  
外郎娶郭氏生君兄弟三人而君最季髮未植即失  
父母獨與二兄居父吏廉寡遺貲君推財聽兄無所

校兄臬任爲桂林府同知君念家督在已乃不爲舉  
子學學爲詩甚溺探蒐古籍名家句解節會久之放  
意敷詞往往不落世調可覽誦又喜讀史研核今往  
興衰治亂之故間出已見置論褒貶且慕許由善卷  
嚴陵之爲人淪淪寓遐心焉劉氏世以節縮築富君  
尤朴嗇自善故產著益豐然顧義而尚儉伎其女兒  
有子曰蕭暄少孤危君取鞠於家爲置婚還其奪業  
竟得存女兒後性喜客隨具治食爲娛酒酣輒誦先  
世遺文召諸孫及他子弟聽之自傷早孤遇祖考愍  
思必變服泣奠絕弗修浮屠事厭風水陰陽拘忌之



說每日郭景純乃不自保其躬葬經何可信也世謂篤論平生絕跡城府終身不註吏議自號耕隱人亦呼為耕隱先生云君素鮮疾病嘉靖丁酉九月三日微不適遂終於正寢生景泰甲戌年八十有四配蕭氏繼配顏氏子男三長椿早世仲梅青田縣學訓導季杞封文林郎龍溪知縣孫男五長天球次天授舉進士初令龍溪入為刑部主事次天賜天職天簡將葬刑部以文林公之命具處士行實乞予銘其言曰先祖有善弗揚不孝無是而稱之之謂誣不肖不敢陷於斯二者其友陳進士昌積稱引克合可徵為之

銘曰

菑也可以秉穫潛也可以遠注揭揭處士植義務滋有善弗施吾見其孫執憲而文是將大其門乎



鈴山堂集卷第三十二

鈴山堂集卷第三十二目錄

墓誌銘 表 傳

溧陽徐夫人墓表

封大淑人王氏墓碣銘

太淑人栢氏墓誌銘

淑人王氏墓誌銘

封太淑人李氏墓誌銘

封恭人秦氏墓誌銘

封安人陶氏墓誌銘

太孺人阮氏墓誌銘



鈴山堂集卷第三十二

鈴山堂集卷第三十二目錄

墓誌銘 表 傳

溧陽徐夫人墓表

封大淑人王氏墓碣銘

太淑人栢氏墓誌銘

淑人王氏墓誌銘

封太淑人李氏墓誌銘

封恭人秦氏墓誌銘

封安人陶氏墓誌銘

太孺人阮氏墓誌銘



安人周氏墓誌銘

封安人高氏墓誌銘

封宜人范氏墓誌銘

封太孺人呂氏墓誌銘

御史朱君妻封孺人墓誌銘

鄉進士唐君妻墓誌銘

華母傳

鈴山堂集卷第三十二

墓誌銘

溧陽徐夫人墓表

南京光祿少卿朝列大夫史公諱後之夫人徐氏以  
嘉靖十三年閏二月甲寅卒以十一月壬寅葬從光  
祿公之墓而其子進士際請予詞刻於隧首之石嗚  
呼光祿公之歿橫罹讒誣聞者傷之矣當是時際子  
然立外侮叢至坎懍萬狀夫人銜茹悲苦獨撫其子  
曰往成汝學必力以無墜父志際感奮折節才譽隱  
起一時名卿文士無不知之者由是舉進士甲科試



政銓曹會奉詔使南方便道歸省夫人命服拜床下  
時天人已寢疾一見歡甚既而悲不自勝母子相泣  
閭里聚觀歎息曰幸哉有子乃再振厥世夫人之教  
也蓋越兩月而夫人卒際克盡力後事云徐氏惟中  
山王開國勲第一世享爵秩碩大顯盛夫人王七世  
孫太子太傅魏國莊靖公之季女太子太傅成國莊  
簡公之外孫也蕃愛稠息弗輕許字光祿公舉進士  
爲南京刑科給事中有盛名莊靖一見器之遂許妻  
焉夫人柔明祇慎相其夫以正而順事其姑以敬撫  
滕御以寬際前配王出也蓋視育之芒已所出嗚呼

能不恃其貴富而克盡其行已之道困阨怫鬱之來  
而安處之以俟夫天之定此學士大夫之所難也而  
以女子能之豈不賢哉石門之阡伉儷同藏厥澤孔  
延來者其昌乎

封太淑人王氏墓碣銘

太淑人王氏吏部侍郎徐公縉之母也始公之考封  
君諱潮元配沈氏父無嗣聞太淑人在室有賢稱乃  
受于王之廟而歸太淑人既入門敬以承舅姑恭以  
順夫嫡徐故碩宗也家食千指泉貨出納之度先祭  
賓燕之需男女耕織之業僮僕之役其食飲服用盈



縮之節緒錯絲焚莫之適理太淑人躬任其勞凡所處畫條度整然而沈夫人自讓其能遂授以家政上下仰成焉封君逸老湖山寄興吟咏築室治圃以奉親爲樂曾不內顧者繁太淑人是賴太淑人生三子長即吏部公次曰紳吏部舉進士入翰林爲編修以初考得貶封沈而王例不獲封建侍 今上于講幄擢貳銓曹於是太淑人始有今封使者捧誥書至第衆以爲榮然太淑人不色喜曰封君之弗逮也既而公遭誣賧乃至落職以歸衆以爲惜然太淑人不色愠曰謗起無稽而成於不察過不在子也君子謂太

淑人明于大誼令于慈誨可不謂賢乎女一適馬叔雍孫男六玄度玄慶玄成玄齡玄理玄佐生景泰壬申四月廿六日卒嘉靖壬寅七月十三日享年八十有九葬以明年癸卯二月十日墓在吳縣西洞庭金鐸山從封君之兆吏部以書來告嵩使刻詞隧首之石嵩獲交於公四十年視若弟昆誼不得辭謹敘而系之以銘銘曰

猗嗟淑人夙稟懿質昔在若考慎所攸匹爰歸于徐宜其家室孝媚諸姑敬順弗失克勤任事肅共翼翼亦既有子展也大成博綜墳籍蔚爲儒英爰自文苑



遂陟銓衡誥書煌煌言即于第玳首金葩龍文雙峙  
介福名堂維 帝之制始造之艱晚則多祉古稱媿  
耦萬福之原不觀夫人實大徐門以引勿替螿螿後  
昆勒詞貞石以永其存

太淑人栢氏墓誌銘

太淑人栢氏錦衣衛都指揮僉事諱珍父也被選爲  
憲廟賢妃其姊也榮祿大夫左軍都督府都督同  
知袁公諱彬舅也初授中書舍人繼襲錦衣衛都指  
揮僉事諱熹其夫也初榮祿公起行伍扈從 英宗  
皇帝北狩艱危翊護實懋厥功天順復辟即拜錦衣

陟督府恩寵冠一時太淑人來歸其門族類尊顯不  
見其有驕盈之色敬事舅姑順承夫子仁卹媼族內  
外稱宜焉生天順己卯七月一日卒嘉靖己丑七月  
二十八日其壽七十有一九月二十二日合葬都城  
東北花園之原子三人長天章錦衣都指揮僉事管  
鎮撫司事次某某先卒女二適都指揮狄唐錦衣指  
揮張達孫一人良懋將葬天章以予鄉人也故來請  
銘銘曰

烈烈榮祿扈蹕沙漠險難周旋執事有恪虞淵日浴  
渤海龍翔錫命酬勲祭戟旂常燕及嗣人休有耿光



金上卷集 卷三言錄 四  
婉婉夫人 帝妃之姊來嬪表宗職饋主祭歲時來  
寧列侯戚里文駟雕軒錯繡紛綺維貴弗盈維富弗  
有載其德仁以峙永久孰豐其川弗羨其源都城之  
東鬱鬱崇原夫也同藏松檟日繁滌美昭先俾世勿  
護

淑人王氏墓誌銘

淑人王氏京師人歸于張爲錦衣指揮使其次室  
年六十有四以嘉靖十年二月十日卒于乾寧之里  
第惟張氏爲國戚里爵號命書燕及宗親顯盛光大  
淑人每至京師入朝 昭聖康惠慈壽皇太后留侍

眷之翟雞文錦之袍寶簪珠珥之飾饜饉珍異之饌  
賚予甚厚時顧問家言及閭閻民隱淑人敷對有儀  
凡可惠利下人者力贊成之人以是稱其賢錦衣君  
元配金氏淑人佐之執謙敦素罔有違言門內與與  
如也淑人生子一人曰偉蚤世女三人長適魏國公  
徐鵬舉次適瑞安侯王橋次適恭順侯吳世興子某  
淑人之卒也 昭聖聞計遣中官賜奠賻是年五月  
日葬祔于先塋之次於是太師昌國公謀于宗人  
曰叔母有賢德葬宜有銘示後迺來請銘銘曰  
託靈椒塗慶之多朝于內庭服委佗姻戚來壽車駢



羅溘其下世傷如何銘勒玄石永弗磨

封太淑人李氏墓誌銘

兵部尚書楊公總督陝西邊務之三年母封太淑人李氏卒于固原督府之寢嘉靖二十二年十一月十四日也年八十有一先是尚書以太淑人年高䟽乞休致歸養 上以邊場事殷詔奪之俸二級既乃黠虜犯邊公督師擊之績聞詔復其俸加太子少保君子曰賢哉楊公不遺親孝也勤事忠也至是有司議太淑人卹典詔遣官賜祭葬如例而厥考贈尚書匏翁歿且葬若干年於是并賜祭以從公之請蓋異數

云太淑人姓李氏家世蒲州人生而雅重不妄笑言歸匏翁以孝謹稱翁筮仕幕職歷佐州郡以伉直忤貴倖屢瀕顛沛至空囊以歸太淑人浣衣䟽食自若生今尚書公少雄畧負氣蘄然見頭角太淑人雖苛之意嘗抑之不假以色辭尚書舉進士授戶部主事陞僉事副使謫通判起爲山東布政使右副都御史巡撫四川遭誣訐家食三年復起叅政河南陞浙江按察使尋巡撫寧夏以陟今官太淑人皆至官食其祿既屬疾念瓠翁每欲置義田贍族弗果而尚書已割俸歸管其事則喜曰子克成先志吾無憾矣子男



金山堂集 卷之三 六  
七人長守仁次守義次即尚書公守禮次守智守信  
守廉守潔女四孫男十五曾孫男二尚書卜以年  
月日合祔於匏翁之兆而書來屬銘其墓謹按  
春秋之義母以子貴豈獨以貴又因以徵其賢焉尚  
書功在王室蔚為名卿非母之賢而能然哉若太淑  
人者是宜銘銘曰

天欲生賢益人國必先令德施訓育於古為教自胎  
腹長而不遷乃習孰吁嗟楊母真令淑相夫歷艱儉  
自服撫成尚書國器夙官箴在堂日祇肅天為作善  
畀全福見子八座厚食祿龍章褒錫恩燁煜况成夫

志惠里族勒銘玄室流馨馥

封恭人秦氏墓誌銘

都察院左僉都御史黃巖劉公舜弼巡撫河北歸之  
明年為嘉靖壬寅五月二十七日喪厥配秦恭人于  
家公哭之哀明年月日祔葬於先墓韓山之陽  
而其子貢士承裕入京師泣告子曰承裕奉父命乞  
吾母之銘所以慰吾父之思也予悲其言不能辭按  
狀恭人秦氏世家山西蒲州父諱某仕至陝西按察  
副使初按察公為御史居京師與刑部郎中劉北村  
先生友善先生仲子今都憲未授室間以婚請按察



金山堂集 卷之三 十一  
公諾焉秦家蒲劉家襄垣兩翁雅相契合婚媾惟良  
不以千里爲遠也恭人歸劉氏年十六而內外稱其  
有禮事姑張夫人每飯必親操釜釐烹調之不取以  
他事解而姑安其孝都憲未第時家稍不繼恭人即  
脫簪佐費及舉進士改翰林庶吉士授給事中旋以  
言被謫稍弗憚恭人趣之泣任曰君豈不安於命哉  
其後歷藩臬至今官恭人皆從行隨事規益而夫賴  
其助此公之所以哭而哀者也恭人卒時年五十有  
二生三男子長承裕弱冠舉于鄉次承華承祥劉氏  
自北村先生科第起家伯子紫巖公仕至吏部尚書

予與同官翰林歲丁丑與都憲同校文禮闈契分夙  
厚故銘也不可以辭銘曰

懿哉夫人婦所宗以榮繼興繫其功姑嫜內事竭孝  
恭相厥君子敬以忠關雎雞鳴有古風孰窺其庭肅  
而雍衆胤象賢當奮庸惜哉中殞壽不崇韓山峨峨  
鑿斯宮勒詞鑱石垂無窮

### 封安人陶氏墓誌銘

臨守徐君用中之母封安人陶氏以嘉靖癸未十一  
月二十八日卒于常州之私第方是時安人年六十  
九矣先是君日謀歸養疏再上求致其事不得請常



悒悒不自聊及聞計袒括號慟以書告其友高曰微  
官羈人爰及大故傷哉卜明年甲申之十一月某日  
祔于考建安訓導封刑部主事諱某之墓而屬高誌  
其葬按陶氏常州武進人安人之考武岡州學正諱  
永以行義聞于鄉博極羣書尤邃於經及門受教多  
名士安人生于武岡之學舍少則淑慧以習於父母  
之教也故能通書史大義仰俯有儀以閑於婦之則  
也故舅姑謂得賢婦妯娌敬事慕其所爲以爲女師  
以安於夫之貧也故績緝儉勤出奩具以相其費而  
不言刑部素伉直非非是是無所苟合爲建安督課

諸士以嚴安人曰是吾父嘗然及聞其數以言忤監  
司則止之曰卑位伉言非福也盍歸乎刑部由是罷  
歸以就其子之封蓋孺人之爲女爲婦者如此生子  
四人長學蚤卒次即臨江君名問用中字也次思次  
辨臨江廉靜而文志期古人於世所謂毀譽欣戚一  
不以屑意盖有以自養者識者以是知母之能教也  
女二適劉宗陽吳仁孫男四天叙天秩天衢其一尚  
幼銘曰

命於朝寵服以宜里有色養婦子嘻嘻殖祿考終無  
盛與夷仕則遠違朝夕孔悲刻銘幽宮慰其子之思



考

太孺人阮氏墓誌銘

太孺人阮氏故儒家女延平守孫公諱某之次室實生今春坊中允承恩嘉靖初元上登極推恩以受今封太孺人始入門事嫡姚宜人得其歡心姚嬰未疾臥床褥太孺人晨夕侍湯藥靡懈病亟以子曰恒甫者囑太孺人曰是累汝矣可善視之太孺人鞠養顧復以有成立延平公即世內外多故太孺人幹理勤瘁中允君以故得專力問學起家進士入中秘文譽著聞于時太孺人性煦煦慈愛婢僕不忍譴呵寒

燠必預治服履遺之見里中寒餒者愀然憐之而賑之身務儉約寸銖尺帛不忍妄費雖受封冠帔朱袍罕御以布素終其身焉初中允君官翰林乞告歸侍久之不忍去太孺人屢趣之曰爾荷國恩宜自効毋以我為念中允君不得已行歲餘輒復思歸嘗冊封安南及校文南畿皆假道一歸省最後則疏乞終養詞甚懇切上許之歸踰年太孺人卒享年七十有七於是太孺人稱備福中允君稱孝矣孫男克紹克懋次尚幼明年某月日葬蟠龍塘延平公之墓中允自述狀以予舊同史局來請銘銘曰



欽山堂集 卷之三  
孰昌厥家萬福攸始奕奕官臣夫人之子匪家之昌  
維國之光爰以子貴 錫命斯皇維詔後人刻銘以  
葬

安人周氏墓誌銘

安人周氏泰順知縣劉君桐之妻南京刑部郎中夢  
詩之母也刑部以主事初考例得貶封其親當是時  
泰順自守其職毋獨被勅有今封曰安人云安人靜  
而正儉而禮上承下御無不得宜蓋泰順爲諸生也  
貧而專於學既領鄉薦爲校官河南夏縣浙天台兩  
邑其貧猶然也而敦學弗怠安人能以勤儉相之紡

績紉綴敝衣菲食未嘗有怨尤悔感之色已而君擢  
宰漳浦泰順兩邑及子成進士官于朝豐顯矣安人  
處之未嘗易其素也泰順始迎二親至官邸食其祿  
其後春秋高不能復至安人獨留家以養敬恭朝夕  
未嘗有違志而舅姑安之忘其子之在外也安人生  
子四人長即刑部次夢禮夢賢次夢弼蚤世嘉靖甲  
申四月十八日安人卒於永新之私第年五十有四  
蓋刑部敏銳蹕絕弱冠筮仕劇曹迅邁有聞遠且大  
才艾也而安人弗待矣生成化辛卯九月二十四日  
葬於某年 月 日墓某山之原銘曰



省其約弗隕穫處其羸弗銜盈德維今慶以增刻茲  
銘美可徵

封安人高氏墓誌銘

安人姓高氏福州候官人封戶部主事莊君文玄之  
妻南昌守惟春之母也曾祖諱旭提學江西按察僉  
事祖諱某承事郎考諱某清遠教諭安人在家以能  
事其繼母爲父所鍾愛歸于莊能以事父母者事其  
舅姑舅姑安之其處妯娌和而有禮其御臧獲嚴而  
有恩雖處豐裕其自奉養未嘗擇衣食其治賓祭中  
饋之事既老猶身親之家衆有能者不付也戶部君

曰余教桐江瓊海出而訓課諸生樂與賢士大夫遊  
能不以内事嬰吾慮者吾妻有助焉耳比余乞休歸  
吾妻喜慰過於居官蓋世人之所慕榮與利者安人  
無嗜焉其端雅修潔天性獨得也生二子惟春舉進  
士筮仕戶曹歷知黃州南安南昌三郡治行稱最次  
惟楨安人以嘉靖五年七月十二日卒于家春秋五  
十有三明年某月日葬于某山之原於是戶部自述  
其妻之世出行事授之南昌以來乞銘銘曰

陰教之興女有圖史師氏命之罔匪內事世弊俗偷  
茲道以弛於惟夫人稟受天至菲食卑躬靖慎明賢



金山堂集 卷之三 誥銘 十一  
言循于經行協于軌弗勸而能允也女士配淑胤賢  
有顯厥世尚配古人輝光無止

封宜人范氏墓誌銘

宜人范氏太平知府龍公夔之妻太常寺卿暹之婦  
上林苑監蕃育署錄事復初醫學正科復祚鄉貢進  
士復禮之母也范氏之先蘇州常熟人祖隸尺籍於  
錦衣衛遂家京師是時太常公以能書直內閣兩家  
往來宜人之父諱順知太守必貴故歸以其子宜人  
入奉舅姑并曰親操恭儉有制外內稱賢太守始領  
鄉薦累上春官不偶不能無尤蹙之色宜人數慰喻

勞勉之曰幸無墮所業觀君器貌豈得終抑耶其後  
果舉進士高第歷官郎署出綰郡符勤慎著稱皆宜  
人有助焉生子四人其季復祐亦例受冠帶蚤卒女  
一適都憲高公仲子祚孫男四曾孫男一於是太守  
謝政歸卒十餘年矣宜人壽至七十有七見其子列  
仕籍名薦書諸孫玉立衍衍愉愉媚于朝夕嘉靖丙  
戌四月十七日卒于宜春之里第是歲九月日啓太  
守公之壙而合葬焉其葬也諸子以銘爲請銘曰  
有幽新宮袁水之鄉曰嬪邦侯終也同藏吁嗟夫人  
有德有祉異恩斯來吾見其子



封太孺人呂氏墓誌銘

太孺人呂氏世家鎮江贈監察御史曹公諱綬之妻  
南京太僕少卿倣之母年七十三以嘉靖癸巳三月  
十日卒明年十月某日葬墓某山之原子三人長即  
太僕舉進士爲御史才名聞于時仲曰倣其季曰儒  
蚤卒女二適林禧施良孫男六人恒悅悅恬懷慎孫  
女五人適朱節費忱王思范曉錢某太孺人明慧而  
仁恭慎以有禮始入門事姑嚴氏承顏色教令能得  
其權相御史公得輔佐之宜公蚤世撫教諸子備歷  
勞勩曹氏中落矣乃豐顯裕盛子姓蕃衍有今日實

太孺人之力焉將葬太僕以予同年友也故來屬以  
銘銘曰

油雲蒼施百穀泄泄相我御史夫人之懿夫人頎頎  
明飭靜嘉蓄澤肇祥以啓有家爰有美子維國之華  
爲中執法糾慝正邪出使入侍里第來過車服駢羅  
京江之涯 皇有命書金葩玳首閣老宗工撰文爲  
壽割牲考鍾黍稷籩豆告其先人奏假在廟京人聚  
觀太息嗟咨誰之瘁矣碩茂榮滋偉歟夫人德實致  
之于前有繼于後有貽詵詵諸孫服習書詩考終得  
願萬福如茨其來未艾視此銘詞



鹽山堂集 卷之三 詩銘  
監察御史朱君妻封孺人墓誌銘

御史朱君士光奉命按吳道聞其配姚氏之喪泣自書狀走使入金陵以來請銘曰吾妻新昌人宋狀元勉之後也自其爲女十一歲無母能事父而孝理其家而整撫其幼弟妹食飲衣服不失其時比歸予年始十六能以事父者事吾先大夫太恭人以理父家者理吾家予少也宥多疾吾妻規諫調護有隱德焉尤能相勉以勤于學夜讀宿膏火進飲餽有常度予成進士令旌德海鹽二邑吾妻皆隨能尙舍以嚴日惟市蔬必記籍至門擊柝啓鑰納焉僮母得踰闕海

鹽巖邑也前之爲令多坐累弗振其得以御史召者自予始使予守官幸免於過者抑吾妻之助也吾居臺遇事利病得失未敢以嘿即涉譴拂叵測或憂之吾妻弗吾過也及予免先大夫喪將入京則止之曰君言職也顧今得言耶尙出耶往食祿而憂曷若守此田里逸身而薄享以遺爾子孫也是歲庚辰先帝南巡郡邑繹騷而嘆曰我爲婦人而得從子隱幸矣其智性明識理道多此類予居再期今上登極乃出後巡鹺山西一年入臺又一年乃有今命斬取道還家而吾妻亡矣悲夫吾妻之葬也子其爲我



以銘嵩嘗觀於今士大夫材行器業有聞于時非獨自樹礪要亦有內助焉然內行弗克彰觀其夫所既立與其所稱而思者其賢可知矣孺人生子一人曰誥女一人適吾友傅御史冠卿之孫纓期年而纓卒誓守不二孺人憐其女之孀也數勞苦慰勉之從其志生某年月日卒嘉靖三年二月二十六日得年四十有八葬以某月日墓某山之原銘曰

姚世望筠篤生夫人邦伯維舅御史是嬪少則來歸已享其貴匪貴之享職縫主饋兩邑之治去常見思臺中之議曠厲弗隨維克相之厥聞以馳約取深慮

亦審其時士也則難矧女之爲曷以傳之眎此銘詩

鄉進士唐君妻朱氏墓誌銘

唐與朱同望晉寧而同出於浙江之嚴州其先在國初俱發戍雲南中衛領屯種由是居晉寧兩家同里閨相好也孺人之父諱克瀛景泰中領省薦仕定州訓導兄諱鳳成化甲午與唐君以敬又同領省薦以敬爲其子佐擇婦聞孺人賢遂委禽焉蓋孺人之未行也克閑內則鍾愛於父若兄稱賢女既歸也舅判成都從姑在宦邸孝謹無違禮稱賢婦相其夫力學有文領弘治壬子省薦克世其業稱賢妻迨其夫



之歿也執舅與夫喪稱未亡人遺孤者三長曰鉞次  
曰錡次曰鑄皆甫髫穉保抱携持矢濟艱難而迄見  
其子之成於是稱賢母焉孺人生成化辛卯十月十  
有七日卒嘉靖戊子二月二十有五日年五十有八  
錡舉進士甲科觀政戶部聞孺人訃奔歸以明年己  
丑某月日合葬于某山之原予教國子錡為諸生館  
下知其文行竒之故孺人之葬也錡拜泣奉狀以請  
予銘其友戶部主事孫君道夫實著狀相之以請乃  
為銘曰

誨子而彥服位在朝弗享其榮昔也劬必公世則多有

云胡弗悲猶嗟孺人銘永其垂

### 華母傳

華母孺人姓鄒氏常州無錫人也華與鄒同望于錫  
兩家皆豐財產而孺人之父曰某娶王氏尚書文肅  
公女也孺人始往來外氏容櫛端雅進止有度文肅  
異之於是華處士東洋君父無子晚得子曰鯨愛之  
為擇所配聞鄒女賢而文肅於華君故厚善即媒往  
求焉議以克協孺人來歸上下莫不贊賀姑年高有  
疾孺人事之怡謹盡孝或淹月衣旣不釋姑臨終祝  
曰新婦事我善願新婦有子婦亦如新婦善事我也



東洋君卒鯨治堊與祭咸中禮孺人實相之而鯨十  
果人也遇事敢敏直氣昌辭乞乞期自樹顧遭訟繫  
連歲不得白白歸乃以疾終孺人含茹悲苦公私酬  
應持危舉墜督教諸子使就學爲鄉里善士東洋君  
之業弗衰焉初鯨生子八人女五人而側出者四男  
一女孺人愛視之如一孺人性約素服御取給則止  
家嘗火什器俱毀孺人無戚感之色曰物存毀有數  
惟省已答譴而已孺人卒時年五十有七八子者長  
曰延壽次延禧延慶延祚延禮延福延祿延緒  
論曰先王之世非獨外治蓋亦有內教焉故女子必

有師圖史陳誠蓄德勸志化行閨門後彤史職廢婦  
則姆訓不及於家若今鄒孺人之賢無假輔告動應  
禮法非其得於天性然歟抑陶淬漸習族類顯碩有  
自哉



鈴山堂集卷第三十一終

鈴山堂集卷第三十三目錄

碑 阡表

勅修棗林祖塋紀 恩之碑

嘉林阡表

慈德阡表

太子少保吏部尚書恭肅周公墓表

南京戶部尚書約菴周公墓表

贈尚書實菴胡公墓表銘

畜德發祥之碑

臺灣國家圖書館, NATIONAL CENTRAL LIBRARY, TAIWAN, R.O.C.